

李翰林集

草堂集序

宣州當塗縣令李陽冰



李白字太白隴西成紀人涼武昭王嵩九世孫蟬聯
珪組世爲顯著中葉非罪謫居條支易姓與名然自
窮蟬至舜七世爲庶累世不大曜亦可歎焉神龍之
始逃歸于蜀復指李樹而生伯陽驚姜之夕長庚入
夢故生而名白以太白字之世稱太白之精得之矣
不讀非聖人之書耻爲鄭衛之作故其言多似天仙
之辭凡所著述言多諷興自三代已來風騷之後馳

驅屈宋鞭撻揚馬千載獨步唯公一人故王公趨風
列岳結軌群賢翕習如鳥歸鳳盧黃門云陳拾遺橫
制頽波天下質文翕然一變至今朝詩體尚有梁陳
宮掖之風至公大變掃地併盡今古文集過而不行
唯公文章橫被六合可謂力敵造化歟天寶中皇祖
下詔徵就金馬降輦步迎如見綺皓以七寶牀賜食
御手調羹以飯之謂曰卿是布衣名爲朕知非素畜
道義何以及此置于金鑿殿出入翰林中問以國政
潛草詔詰人無知者醜正同列害能成謗格言不入
帝用踈之公乃浪跡縱酒以自昏穢詠歌之際屢稱

東山又與賀知章崔宗之等目爲八仙之遊謂公謫
仙人朝列賦謫仙人謔凡數百首多言公之不得意
天子知其不可留乃賜金歸之遂就從祖陳留採訪
大使彥允請北海高天師授道籙於齊州紫極宮將
東歸蓬萊仍羽人駕丹丘耳陽冰試絃歌於當塗心
非所好公遐不棄我扁舟而相歡臨當挂冠公又疾
殫草文萬卷手集未修枕上授簡俾余爲序論闕雅
之義始愧卜商明春秋之辭終慙杜預自中原有事
公避地八年當時著述十喪其九今存者皆得之他
人焉時寶應元年十一月乙酉序

李翰林別集序

朝散大夫行尚書職方員外郎直史館

上柱國樂文

李翰林歌詩李陽冰纂爲草堂集十卷史又別收歌詩十卷與草堂集互有得失因校勘排爲二十卷號曰李翰林集今於三館中得李白賦序表讚書頌等亦排爲十卷號曰李翰林別集翰林在唐天寶中賀秘監開於明皇帝召見金鑾殿降輦步迎如見綺皓草和蕃書思若懸河帝嘉之七寶方丈賜食於前御手調羹於是置之金鑾殿出入翰林中其諸事跡草

堂集序范傳正撰新墓碑亦略而詳矣史又撰李白傳一卷事又稍周然有三事近方得之開元中禁中

初重木芍藥即今牡丹也

開元天寶花木記云禁中呼木芍藥爲牡丹

得

四本紅紫淺紅通白者上因移植於興慶池東沉香

亭前會花方繁開上乘照夜車太真妃以步輦從詔

選梨園弟子中尤者得樂一十六色李龜年以歌擅

一時之名手捧檀板押衆樂前將欲歌之上曰賞名

花對妃子焉用舊樂辭焉遽命龜年持金花牋宣賜

翰林供奉李白立進清平調詞三章白欣然承認旨

猶若宿醒未解因援筆賦之其一曰雲想衣裳花想

容春風拂檻露華濃若非群玉山頭見會向瑤臺月下逢其二曰一枝紅艷露凝香雲雨巫山枉斷腸借問漢宮誰得似可憐飛燕倚新粧其三曰名花傾國兩相歡長得君王帶笑看解釋春風無限恨沉香亭北倚闌干龜年以歌辭進上命梨園弟子略約調撫絲竹遂促龜年以歌之太真妃持頗黎七寶杯酌西涼州蒲萄酒笑領歌辭意甚厚上因調玉笛以倚曲每曲徧將換則遲其聲以媚之太真妃飲罷斂繡巾重拜上自是顧李翰林尤異於諸學士會高力士終以脫靴爲深耻異日太真妃重吟前辭力士曰始爲

妃子怨李白深入骨髓何翻拳拳如是耶太真妃因驚曰何翰林學士能欲辱人如斯力士曰以飛燕指妃子賤之甚矣太真妃頗深然之上嘗三欲命李白官卒爲宮中所捍而止白嘗有知鑒容并州識汾陽王郭子儀於行伍間爲脫其刑責而獎重之及翰林坐永王之事汾陽功成請以官爵贖翰林上許之因而免誅翰林之知人如此汾陽之報德如彼白之從弟令問常曰白曰兄心肝五臟皆錦繡耶不然何開口成文揮翰霧散耳傳中漏此三事今書於序中白有歌云吟詩作賦北窓裏萬言不及一杯水蓋歎乎

有其時而無其位嗚呼以翰林之才名遇玄宗之知
見而乃飄零如是宋中丞薦於聖真云一命不霑四
海稱屈得非命歟白居易贈劉禹錫詩云詩稱國手
徒爲爾命壓人頭不柰何斯言不虛矣凡百有位無
自輕焉撰集之次聊存梗槩而已時在統雷州中咸
平元年三月三日序

李翰林集序

前進士魏顥

自盤古劃天地天地之氣艮于西南劔門上斷橫江
下絕岷峨之曲別爲錦川蜀之人無聞則已聞則傑

出是生相如君平王褒楊雄降有陳子昂李白皆五
百年矣白本隴西乃放形因家於綿身旣生蜀則江
山英秀伏羲造書契後文章濫觴者六經六經糟粕
離騷離騷糠粃建安七子七子至白中有蘭芳情理
宛約詞句妍麗白與古人爭長三字九言鬼出神火
瞪若乎後耳白久居峨眉與丹丘因持盈法師達白
亦因之入翰林名動京師大鵬賦時家藏一本故賓
客賀公竒白風骨呼爲謫仙子由是朝廷作歌數百
篇上皇豫游召白白時爲貴門邀飲比至半醉令製
出師詔不草而成許中書舍人以張垆饒逐游海岱

間年五十餘尚無祿位祿位拘常人橫海鷗負天鵬
豈池籠榮之顯始名萬次名炎萬之日不遠命駕江
東訪白游天台還廣陵見之眸子炯然哆如餓虎或
時束帶風流醞藉曾授道籙于齊有青綺冠帔一副
少任俠手刃數人與友自荆徂揚路亡權窆迴棹方
暑亡友糜潰白收其骨江路而舟又長揖韓荆州荆
州延飲白悞拜韓讓之白曰酒以成禮荆州大悅白
始娶于許生一女一男曰明月奴女既嫁而卒又合
于劉劉訣次合于魯一婦人生子曰頗黎終娶于宋
雋昭陽金陵之妓迹類謝康樂世號爲李東山駿

馬羨妻所適二千石郊迎飲數斗醉則奴丹砂撫青
海波滿堂不樂白宰酒則樂顯平生自負人或爲狂
白相見泯合有贈之作謂余爾後必著大名於天下
無忘老夫與明月奴因盡出其文命顯爲集顯今登
第豈符言耶解携明年四海大盜宗室有潭者白陷
焉謫居夜郎罪不至此屢經昭洗朝廷忍白又爲長
沙汨羅之傳路遠不存否極則泰白宜自寬吾觀白
之文義有濟代命然千鈞之弩魏王大瓠用之有時
議者柰何以白有叔夜之短儻黃祖過禰晉帝罪阮
古無其賢所謂仲尼不假蓋於子夏經亂離白章句

蕩盡上元末顯於絳偶然得之沉吟累年一字不下
今日懷舊援筆成序首以贈顯作顯酬白詩不忘故
人也次以大鵬賦古樂府諸篇積薪而錄文有差互
者兩舉之白未絕筆吾其再刊付男平津子掌其他
事跡存於後序

李翰林集序

曾鞏

李白詩集二十卷舊七百若干篇今九百若干篇者
知制誥常山宋敏求字次道之所廣也次道旣以類
廣白詩自爲序而未考次其作之先後余得其書考

其先後而次第之蓋白蜀郡人初隱岷山出居湖漢
之間南游江淮至楚觀雲夢許氏者高宗時宰相圉
師之家也以女妻白因留雲夢者三年去之齊魯居
徂來山竹溪入吳至長安明皇聞其名召見以爲翰
林供奉頃之不合去北抵趙魏燕晉西涉岐邠歷商
於至洛陽遊梁最久復之齊魯南浮淮泗再入吳轉
涉金陵上秋浦抵潯陽天寶十四載安祿山反明年
明皇在蜀永王璘節度東南白時卧廬山璘迫致之
璘軍敗丹陽白奔至宿松繫潯陽獄宣撫大使崔渙
與御史中丞宋若思驗白以爲罪薄宜貫而若思軍

赴河南遂釋白囚使謀其軍事上書肅宗薦白才可
用不報是時白年五十有七矣終以璘事長流夜郎
遂泛洞庭上峽江至巫山以赦得釋憇岳陽江夏久
之復如潯陽過金陵徘徊於歷陽宣城二郡其族人
陽冰爲當塗令白過之以病卒年六十有四是寶應
元年也其始終更涉如此此白之詩書所自序可考
者也范傳正爲白墓誌稱白偶乘扁舟一日千里或
遇勝景終年不移則見於白之自序者蓋亦其略也
舊史稱白山東人爲翰林待詔又稱永王璘節度揚
州白在宣城謁見遂辟爲從事而新書又稱白流夜
郎還潯陽坐事下獄宋若思釋之者皆不合於白之
自序蓋史誤也白之詩連類引義雖中於法度者寡
然其辭閎肆雋偉殆騷人所不及近世所未有也舊
史稱白有逸才志氣宏放飄然有超世之志余以爲
實錄而新書不著其語故錄之使覽者得詳焉

故翰林學士李君墓誌 并序

李華

嗚呼姑孰東南青山北世有唐高士李白之墓嗚呼
哀哉夫仁以安物公其懋焉義以濟難公其志焉識
以辯理公其博焉文以宣志公其懿焉宜其上爲王

師下爲伯友年六十有二不偶賦臨終歌而卒悲夫
聖以立德賢以立言道以怕世言以經俗雖白死矣
吾不謂其亡矣也有子曰伯禽天然長能持幼能辯
數梯公之德必將大其名也已矣銘曰

立德謂聖立言謂賢嗟君之道竒於人而侔於天哀
哉

唐故翰林學士李君碣記

尚書膳部員外郎劉全白撰

朝議郎行當塗縣令顧遊秦建

君名白廣漢人性倜儻好縱橫術善賦詩才調逸邁

往往興會屬詞恐古之善詩者亦不逮尤工古歌少
任俠不事產業名聞京師天寶初玄宗辟翰林待詔
因爲和蕃書并上宣唐鴻猷一篇上重之欲以綸誥
之任委之同列者所謗詔令歸山遂浪跡天下以詩
酒自適又志尚道術謂神仙可致不求小官以當世
之務自負流離輻輳竟無所成名有子名伯禽偶遊
至此遂以疾終因葬於此文集亦無定卷家家有之
代宗登極廣拔淹瘁時君亦拜拾遺聞命之後君亦
逝矣嗚呼與其才不與其命悲夫全白幼則以詩爲
君所知及此投弔荒墳將毀追想音容悲不能止邑

有賢宰顧公遊秦志好爲詩亦常慕效李君氣調因
嗟盛才冥冥遂表墓式墳乃題貞石冀傳於往來也
貞元六年四月七日記沙門履文書墳去墓記一百
二十步

唐左拾遺翰林學士李公新墓碑并序

宣歙池等州觀察使范傳正

騏驥筋力成意在萬里外歷塊一蹶斃於空谷唯餘
駿骨價重千金大鵬羽翼張勢欲摩穹昊天風不來
海波不起塌翅別島空留大名人亦有之故左拾遺
翰林學士李公之謂矣公名白字太白其先隴西成

紀人絕嗣之家難求譜牒公之孫女搜於箱篋中得
公之亡子伯禽手疏十數行紙壞字缺不能詳備約
而計之涼武昭王九代孫也隋末多難一房被竄于
碎葉流離散落隱易姓名故自國朝已來編於屬籍
神龍初潛還廣漢因僑爲郡人父客以通其邑遂以
客爲名高卧雲林不求祿仕公之生也先府君指天
枝以復姓先夫人夢長庚而吉祥名之與字感所取
象受五行之剛氣叔夜心高擬三蜀之雄才相如文
逸瓌竒宏廓拔俗無類少以俠自任而門多長者車
常欲一鳴驚人一飛冲天彼漸陸遷喬皆不能也由

是慷慨自負不拘常調器度弘大聲聞于天天寶初
召見於金鑿殿玄宗明皇帝降輦步迎如見園綺論
當世務草荅蕃書辯如懸河筆不停輟玄宗嘉之以
寶牀方天褰食於前御手和羹德音褒美褐衣恩遇
前無比傳遂直翰林專掌密命將處司言之任多陪
侍從之遊他日泛白蓮池公不在宴皇歡既洽召公
作序時公已被酒於翰苑中仍命高將軍扶以登舟
優寵如是既而上疏請還舊山玄宗甚愛其才或慮
乘醉出入省中不能不言温室樹恐撥後患惜而遂
之公以爲干鈞之弩一發不中則當摧撞折牙而永

息機用安能做碌碌者蘇而復上哉脫屣軒冕釋羈
韉鎖因肆情性大放宇宙間飲酒非嗜其酣樂取其
昏以自富作詩非事於文律取其吟以自適好神仙
非慕其輕舉將不可求之事求之欲耗壯心遣餘年
也在長安時秘書監賀知章號公爲謫仙人吟公烏
栖曲云此詩可以哭鬼神矣時人又以公及賀監汝
陽王崔宗之裴周南等八人爲酒中八仙朝列賦謫
仙歌百餘首俄屬戎馬生郊遠身海上往來於斗牛
之分優游沒身偶乘扁舟一日千里或遇勝境終年
不移時長江遠山一泉一石無徃而不自得也晚歲

渡牛渚磯至姑孰悅謝家青山有終焉之志盤桓利
居竟卒於此其生也聖朝之高士其往也當塗之旅
人代宗之初搜羅俊逸拜公左拾遺制下於彤庭禮
降於玄壤生不及祿歿而稱官嗚呼命歟傳正生唐
代甲子相懸常於先大夫文字中見與公有潯陽夜
宴詩則知與公有通家之舊早於人間得公遺篇逸
句吟詠在口無何叨蒙恩獎廉問宣池按圖得公之
墳墓在當塗邑因令禁樵採備洒掃訪公之子孫欲
申慰薦凡三四年乃獲孫女二人一爲陳雲之室一
乃劉勸之妻皆編戶也也因召至郡庭相見與語衣

服村落形容朴野而進退閑雅應對詳諦且祖德如
在儒風宛然問其所以則曰父伯禽以貞元八年不
祿而卒有兄一人出遊一十二年不知所在父存無
官父歿爲民有兄不相保爲天下之窮人無桑以自
蠶非不知機杼無田以自力非不知稼穡况婦人不
任布裙糲食何所仰給儷于農夫救死而已又不敢
聞於縣官懼辱祖考鄉閭逼迫忍耻來告言訖淚下
余亦對之泫然因云先祖志在青山遺言宅兆頃屬
多故殯於龍山東麓地近而非本意墳高三尺日益
摧圯力且不及知如之何聞之憫然將遂其請因當

塗令諸葛縱會計在州得諭其事縱亦好事者學爲
歌詩樂聞其語便道還縣躬相地形卜新宅于青山
之陽以元和十二年正月二十三日遷神于此遂公
之志也西去舊墳六里南抵驛路三百步北倚謝公
山即青山也天寶十二載勅改名焉因告二女將改
適於士族皆曰夫妻之道命也亦分也在孤窮旣失
身於下俚仗威力乃求援於他門生縱偷安死何面
目見大父於地下欲敗其類所不忍聞余亦嘉之不
奪其志復井稅免徭役而已今士大夫之葬必誌於
墓有勲庸道德之家無樹碑于道余才術貧虛不能

兩致今作新墓銘輒刊二石一寘于泉扃一表于通
路亦峴首漢川之義也庶芳聲之不泯焉文集二十
卷或得之於時之文士或得之於宗族編緝斷簡以
行于代銘曰

嵩嶽降神是生輔臣蓬萊謫真斯爲逸人晉有七賢
唐稱八仙應彼星象唯公一焉晦以麴蘖暢於文篇
萬象奔走乎筆端萬慮泯滅乎罇前卧必酒甕行惟
酒船吟風詠月席地幕天但貴乎適其所適不知夫
所以然而然至今尚疑其醉在千日寧審乎壽終百
年謝家山兮李公墓異代詩流同此路舊墳卑庠風

雨侵新宅爽塏松栢林故鄉萬里且無嗣二女從民
永於此猗歟琢石爲二碑一藏幽隧一臨岐岸深谷
高變化時一存一毀名不虧

翰林學士李公墓碑

前守秘書省校書郎裴敬

李翰林名白字太白以詩著名召入翰林世稱才名
占得翰林他人不復爭先其後以脅從得罪旣免遂
放浪江南死宣城葬當塗青山下李陽冰序詩集粗
具行止敬嘗遊江表過其墓下愛其才壯其氣味其
嗜酒知其取適作碑於墓且曰先生得天地秀氣耶

不然何異於常之人耶或曰太白之精下降故字太
白故賀監號爲謫仙不其然乎故爲詩格高旨遠若
在天上物外神仙會集雲行鶴駕想見飄然之狀視
塵中屑屑米粒蟲睫紛擾菌蠢羈絆蹂躪之比又嘗
有知鑒客并州識郭汾陽於行伍間爲脫免其刑責
而獎重之後汾陽以功成官爵請贖翰林上許之因
免誅其報也又常心許劍舞裴將軍予曾叔祖也嘗
投書曰如白願出將軍門下其文高其氣雄世稀其
本懼失其傳故序傳之大和初文宗皇帝命翰林學
士爲三絕贊公之詩歌與將軍劍舞洎張旭長史草

書為三絕夫夫付上才必同靈氣賢傑相殺龍虎兩
合可為知者言非常人所知也夫古以名德稱占其
官謚者甚希前以詩稱者若謝吏部何水部陶彭澤
鮑叅軍之類唐朝以詩稱者若王江寧宋考功韋蘇州
王右丞杜員外之類以文稱者若陳拾遺蘇司業元
容州蕭功曹韓吏部之類以德行稱者元魯山陽道
州以直稱者魏文貞狄梁公以忠烈稱者顏魯公段
太尉以武稱者李衛公英公以學行文翰俱稱者虞
秘監唐之得人於斯為盛翰林其以詩稱之一也予
嘗過富塗訪翰林舊宅又於浮圖寺化城之僧得翰

林自寫訪賀監不遇詩云東山無賀老却棹酒船回
味之不足重之為寶用獻知者又於歷陽郡得翰林
與劉尊師書一紙思高筆逸又嘗遊上元蔣山寺見
翰林讚志公云水中之月了不可取刀齊尺量扇迷
陳語文簡事備誠為作者附於此云會昌三年二月
中敬自淝水草堂南遊江左過公墓下四過青山兩
發塗口徘徊不忍去與前濮州鄆城縣尉李劭同以
公服拜其墓問其墓左人畢元宥實備灑掃留縣帛
具酒饌祭公知公無孫有孫女二人一娶劉勸一娶
陳雲皆農夫也且曰二孫女不拜墓已五六年因告

邑宰李君都傑請免畢元宥力役俾專灑掃事嘻享
名甚高後事何薄謝公舊井新墓角落青山白雲共
爲蕭索巨竹拱墓如公卓犖天長地久其名不朽此
爲祭文寫授元宥又爲碑曰
貴盡皆然名存則難故子重名不重官作李翰林碑
十五字而已

李翰林集卷第一

翰林供奉李白

古風上

大雅久不作吾衰竟誰陳王風委蔓草戰國多荆榛
龍虎相啖食兵戈逮狂秦正聲何微茫哀怨起騷人
揚馬激頽波開流蕩無垠廢一作占興雖萬變憲章亦
已淪自從建安來綺麗不足珍聖代復元古垂衣貴
清真群才屬休明乘運共躍鱗文質相炳煥衆星羅
秋旻我志在刪述垂輝映千春希聖如有立絕筆於
獲麟

蟾蜍薄太清蝕此瑤臺月圓光虧中天金魄遂淪沒
蟬竦入紫微大明夷朝暉浮雲隔兩耀萬象昏陰霏
蕭蕭長門宮昔是今已非桂蠹花不實天霜下嚴威
沉歎終永夕感我涕沾衣

秦皇掃六合虎視何雄哉揮劍決浮雲諸侯盡西來
明斷自天啓大略駕群才收兵鑄金人函谷正東開
銘功會稽嶺騁望琅邪臺刑徒七十萬起土驪山隈
尚採不死藥茫然使心哀連弩射海魚長鯨正崔嵬
額鼻象五嶽揚波噴雲雷鬢蔽青天何由觀蓬萊
徐氏載秦女樓船幾時返但見三泉下金棺葬寒灰

鳳飛九千仞五章備絳珠衛書且虛歸空入周與秦
橫絕歷四海所居未得鄰吾營紫河車千載落風塵
藥物祕海嶽採鉛青溪濱時登大樓山舉首望仙真
羽駕滅去影隨車絕迴輪尚恐丹液遲志願不及中
徒茲一作霜鏡中髮羞彼鶴上人桃李何處開此花非
我春唯應清都境長與韓衆親

太白何蒼蒼星辰上森列去天三百里邈爾與世絕
中有綠髮翁披雲卧松雪不笑亦不語冥棲在巖穴
我來逢真人長跪問寶訣粲然忽自哂一作啓授以
鍊藥說銘骨傳其語竦身已電滅仰望不可及蒼然

五情熱吾將營丹砂永與世人別

代

一作

馬不思越越禽不戀燕情性有所習土風固

其然昔別鴈門關今戍龍庭前驚沙亂海日飛雪迷
胡天蟻虱生虎鷄心魂逐旌旃苦戰功不賞忠誠難
可宣誰憐李飛將白首沒三邊

客有鶴上仙

一本云家

飛飛凌太清揚言碧雲裏自

道安期名兩兩白玉童雙吹紫鸞笙去影忽不見迴
風送天聲舉首遠望之飄然若流星願食金光草壽
與天齊傾

咸陽二三月宮柳黃金枝綠幘誰家子賣珠輕薄兒

日暮醉酒歸白馬驕且馳意氣人所仰治遊方及時
子雲不曉事晚獻長楊辭賦達身已老並玄鬢若絲
投閣良可歎但為此輩嗤

莊周夢蝴蝶蝴蝶為莊周一體更變易萬事良悠悠
乃知蓬萊水復作清淺流青門種瓜人舊日東陵侯
富貴固如此營營何所求

齊有侗儻生魯連特高妙明月出海底一朝開光曜
却秦振英聲後世仰末照意輕千金贈顧向平原笑
吾亦澹蕩人拂衣可同調

黃河走東溟白日落西海逝川與流光飄忽不相待

春容捨我去秋髮已衰改人生非寒松年兒豈長在
吾當乘雲螭吸景駐光彩

松栢本孤直難爲桃李顏昭昭嚴子陵垂釣滄波間
身將客星隱心與浮雲閑長揖萬乘君還歸富春山
清風灑六合邈然不可攀使我長歎息其棲巖石間
君平旣棄世世亦棄君平觀變窮太易探元化群生
寂寞綴道論空簾閉幽情騶虞不虛來鸞鷲有時鳴
安知天漢上白日懸高名海客去已久誰人測沉冥
胡關饒風沙蕭索竟終古木落秋草黃登高垣戎虜
荒城空大漠邊邑無遺堵白骨橫千霜差我蔽榛莽

借問誰陵虐

一作虎

天驕毒威武赫怒我聖皇勞師事

鞞鼓陽和變殺氣發卒驟中土三十六萬人哀哀淚
如雨且悲就行役安得營農圃不見征戍兒豈知關
山苦李牧今不在邊人詞豺虎

燕昭延郭隗遂築黃金臺劇辛方趙至鄒衍復齊來
奈何青雲士棄我如塵埃珠玉買歌笑糟糠養賢才
方知黃鶴舉千里獨徘徊

寶劍雙蛟龍雪花照芙蓉精光射天地雷騰不可衝
一去別金匣飛沉失相從風胡滅已久所以潛其鋒
兵水深萬丈楚山邈千重雌雄終不隔神物會當

逢

金華牧羊兒乃是紫烟客我願從之遊未去髮已白
不知繁華子擾擾何所迫崑山採瓊藥可以鍊精魄
天津三月時千門桃與李朝爲斷腸花暮逐東流水
前水復後水古今相續流新人非舊人年年橋上游
雞鳴海色動謁帝羅公侯月落西上陽餘輝半城樓
衣冠照雲日朝下散皇州鞍馬如飛龍黃金絡馬頭
行人皆辟易志氣橫高丘入門上高堂列鼎錯珍羞
香風引趙舞清管隨齊謳七十紫鴛鴦雙雙戲庭幽
行樂爭晝夜自言度千秋功成身不退自古多愆尤

黃犬空歎息綠珠成鬢讎何如鴟夷子散髮棹扁舟

西嶽

一作蓮花山

迢迢見明星素手把芙蓉步虛躡

太清霓裳曳廣帶飄拂弄天行邀我登雲臺高揖衛
叔卿恍恍與之去駕鴻凌紫冥俯視洛陽川茫茫走
胡兵流血塗野草豺狼盡冠纓

昔我遊齊都登華不注峯茲山何峻秀綠翠如芙蓉
蕭颯古仙人了知是赤松借予與一作一白鹿自挾兩
青龍含笑凌倒景欣然願相從

泣與親友別欲語再三咽勸君青松心努力保霜雪
世路多險艱白日欺紅顏分手各千里去去何時還

在世復幾時候如飄風度空聞紫金經白首愁相誤
撫已忽自笑沉吟為誰故名利徒煎熬安得閑途一作
步終留赤玉鳥東上蓬山路秦帝如我求蒼蒼但煙
霧

郢客吟白雪遺響飛青天徒勞歌此曲舉世誰為傳
試為巴人唱和者乃數千吞聲何足道歎息空悽然
秦水別隴首幽咽多悲聲胡馬顧朔雪躑躅長嘶鳴
感物動我心緬然含歸情昔視秋蛾飛今見春蠶生
嫋嫋桑枯葉萋萋柳垂榮急節謝流水羈心搖懸旌
揮涕且復去惻愴何時平

秋露如白玉團團下庭綠我行忽見之寒早悲歲促
人生鳥過目作人生猶一胡乃自結束景公一何愚牛山
淚相續物苦不知足得隴又望蜀人心若波瀾世路

有屈曲三萬六千日夜夜當秉燭

大車揚飛塵亭午暗阡陌中貴多黃金連雲開甲宅
路逢鬪雞者冠蓋何輝赫鼻息干虹蜺行人皆怵惕
世無洗耳翁誰知堯與跖

世道日交喪澆風散淳源不來芳枝桂反棲惡木根
所以桃李樹吐花竟不言大運有興沒群動爭飛奔
歸來廣成子去入無窮門

碧荷生幽泉朝日豔且鮮秋花冒一作綠水密葉羅

青烟秀色空絕世馨香誰為傳坐看飛霜滿凋此紅

芳年結根未得所願託華池邊一作

燕趙有秀色綺樓一作青雲端眉目艷皎月一笑傾

城歡常恐碧草晚坐泣秋風寒織手怨玉琴清晨起

長歎焉得偶君子共乘一作雙飛鸞

容顏若飛電時景如飄風草綠霜已白日西月復東

華鬢不耐秋颯然成衰蓬古來賢聖人一一誰成功

君子變猿鶴小人為沙蟲不及廣成子一作廣乘雲

一作馬駕輕鴻

李翰林集卷第一

李翰林集卷第二

翰林供奉李白

古風下

三季分戰國七雄成亂麻王風何怨怒世道終紛拏

至人洞元象高舉凌紫霞仲尼欲浮海吾祖之流沙

聖賢共淪沒臨岐胡咄嗟

玄風變太古道喪無時還擾擾李葉人雞鳴趨四關

但識金馬門誰知蓬萊山白首死羅綺笑歌無休閒

綠酒晒丹經青娥凋素顏大儒揮金槌琢之詩禮間

蒼蒼三珠樹冥目焉能攀

鄭客西入關行行未能已白馬華山君相逢平原里
壁遺鎬池公明年祖龍死秦人相謂曰吾屬可去矣
一往桃花源千春隔流水

蓐收肅金氣西陸弦海月秋蟬號階軒感物憂不歇
良辰竟何許大運有淪忽天寒悲風生夜久衆星沒
惻惻不忍言哀歌逮一作明發

北溟有巨魚身長數千里仰噴三山雪橫吞百川水
憑凌隨海運烜赫因風起吾觀摩天飛九萬方未已
羽檄如流星虎符合專城喧呼救邊急群鳥皆夜
鳴白日曜紫微三公運權衡天地皆得一澹然四

海清借問何以爲荅言楚徵兵渡瀘及五月將赴雲

南征行一作怯卒非戰士炎方難遠行一作長號別嚴

親日月慘光晶泣盡繼以血心摧兩無聲困獸當猛

虎窮魚餌奔鯨千去不一迴投軀豈全生如何舞干

戚一使有苗平

醜女來効顰還家驚四鄰壽陵失本步笑殺邯鄲人

一曲斐然子雕蟲喪天真棘刺造沐猴三年費精神

功成無所用楚楚且華身大雅思文王頌聲一作天

崩淪安得郢中質一揮成斧斤一作承風

抱玉入楚國見疑古所聞良寶終見棄徒勞三獻君

直木忘先伐芳蘭哀自焚盈滿天所損沉冥道為群
東海沉碧水西關乘紫雲魯連及柱史可以躡清芬
燕臣昔慟哭五月飛秋霜庶女號蒼天震風擊齊堂
精誠有所感造化為悲傷而我竟何辜遠身金殿傍
浮雲蔽紫闥白日難迴光群沙穢明珠衆草凌孤芳
古來共歎息歎息一作今來流淚空沾裳

孤蘭生幽園衆草共蕪沒雖照陽春暉復悲高秋月
飛霜早浙瀝綠豔恐休歇若無清風吹香氣為君一作

誰發

登高望四海天地何漫漫霜被群物秋風飄大荒寒

榮華東流水萬事皆波瀾白日掩徂暉浮雲無定端
梧桐巢鷺雀枳棘棲鷓鴣且復歸去來劔歌行路難

鳳飢不啄粟所食唯琅玕焉能與群雜蹙促爭一餐
朝鳴崑丘樹夕飲砥柱湍歸飛海路遠獨宿天霜寒
幸遇王子晉結交青雲端懷恩未得報感別空長歎

朝弄紫沂

一作泥

海夕披丹霞裳揮手折若

弱

木拂

此西日光雲卧遊八極玉顏已千一作清霜飄飄入無

倪稽首祈上皇呼我遊太素玉杯賜瓊漿一作飡歷萬

歲何用還故鄉永隨長風去天外恣飄揚此一本無

搖裔雙白鷗鳴飛滄江流宜一作與海人狎豈伊雲

鶴儔寄影宿沙月
泓芳戲春洲
吾亦洗心者
忘機從

爾遊

周穆八荒意
漢皇萬乘尊
淫樂心不極
雄豪安足論
西海宴王母
北宮邀上元
瑤水聞遺歌
玉杯音空言
靈跡成蔓草
徒悲千載魂

綠蘿紛歲蕤
繚繞松栢枝
草木有所託
歲寒尚不移
奈何夭桃色
坐歎葑菲詩
玉顏豔紅彩
雲髮非紫絲
君子恩已畢
賤妾將何爲

八荒馳

駐一作

驚飈萬物盡凋落
浮雲蔽頽陽
洪波振

大壑龍鳳脫
罔罟飄飄將安託
去去乘白駒
空山詠

場長一作藿

一百四十年
國容何赫然
隱隱五鳳樓
戔戔橫三川
王侯象星月
賓客如雲煙
鬪雞金宮裏
蹴鞠瑤臺邊
舉動搖白日
指揮迴青天
當塗何翕忽
失路長棄捐
獨有楊執戟
閉關草太玄

桃花開東園
含笑誇白日
偶蒙春風榮
生此豔陽質
豈無佳人色
但恐花不實
宛轉龍火飛
零落早相失
詎知南山松
獨立自蕭颯

秦皇按寶劔
赫怒振威神
逐日巡海右
驅石架滄津
徵卒空九寓
作橋傷萬人
但求蓬島藥
豈思農鴈春

力盡功不贍千載為悲幸農鴈一作農鳶

美人出南國灼灼芙蓉姿皓齒終不發芳心空自持

由來紫宮女共妬青蛾眉歸去瀟湘江沉吟何足悲

宋國梧臺東野人得燕石誇作天下珍却哂趙王璧

趙璧無緇磷燕石非貞真流俗多錯誤豈知玉無作

與珉

殷后亂天紀楚懷亦已昏夷羊滿中野綠蔬盈高門

比干諫而死屈平竄湘源虎口何婉孌女顏空嬋娟

彭城久淪沒此意與誰論

青春流驚湍朱明驟迴薄不忍看秋蓬飄揚竟何託

光風滅蘭蕙白露灑葵藿美人不我期草木日零落

戰國何紛紛兵戈亂浮雲趙倚兩虎鬪晉為六卿分

奸臣欲竊位樹黨日一作自相群果然田成子一旦殺

齊君

倚劍登高臺悠悠送春日蒼榛蔽層丘瓊草隱深谷

鳳皇鳴西海欲集無珍木鶩斯得所一作匹居蒿下盈

萬族晉風日已頽窮途方慟哭

齊瑟彈東吟秦絃弄西音慷慨動顏魄使人成荒淫

彼美一作女佞邪子婉孌來相尋一笑雙白璧再歌千

黃金珍色不貴道詎惜飛光沉安識紫霞客瑤臺鳴

玉琴

越客採明珠提攜出南隅清輝照海月美價傾鴻都
獻君君按劍懷寶空長吁魚目復相哂寸心增煩紆
羽族稟萬方一作化小大有依啁啁一本作周周亦何辜
六翮掩不揮顏銜衆禽翼一向黃河飛飛者莫我顧
歎息將安歸

我到一作行巫山渚尋古登陽臺天空綵雲滅地遠清
風來神女知一作去已又襄王安在哉荒淫竟淪替一作沒
樵牧徒悲哀

惻惻泣路岐哀哀悲素絲路岐有南北素絲易變移
萬事固如此人生無定期田實相傾奪賓客互盈虧
世途多翻覆交道方嶮巇斗酒強然諾寸心終自疑
張陳竟火滅蕭朱亦星離衆鳥集榮柯窮魚守枯池
嗟嗟失懽客勤問何所規

李翰林集卷第二

李翰林集卷第三

翰林供奉李白

樂府上

• 遠別離

公無渡河

蜀道難

梁甫吟

烏夜啼

烏棲曲

戰城南

將進酒

行行且遊獵篇

飛龍引二首

天馬歌

行路難三首

長相思

上留田

春日行

前有樽酒行二首

夜坐吟

野田黃雀行

篁篔謠

雉朝飛

上雲樂

夷則格上白鳩拂舞辭

日出入行

胡無人

猛虎行

北風行

俠客行

關山月

遠別離

遠別離古有皇英之二女乃在

一本無在字

洞庭之南瀟

湘之浦海水直下萬里深誰人不言此離苦

一本無此二句

日慘慘兮雲冥冥猩猩啼煙兮鬼嘯雨我縱言之將

何補皇穹竊恐不照余之忠誠雲憑憑兮欲吼怒堯

舜當之亦禪禹君失臣兮龍為魚權歸臣兮鼠變虎

或云堯幽囚舜野死九疑縣縣皆相似重瞳孤墳竟

何是帝子泣兮綠雲間隨風波兮去無還慟哭兮遠

望見蒼梧之深山蒼梧山崩湘水絕竹上之淚乃可

滅

公無渡河

黃河西來決崑崙咆哮萬里觸龍門波滔天堯咨嗟

大禹理百川兒啼不窺家殺湍湮洪水九州始蠶麻

其害乃去一作古茫一作茫然風沙被髮之叟狂而一作兒
癡清晨臨流欲奚為旁人一作不惜妻止之公無渡河苦
渡之虎可搏河難憑公果溺死流海湄有長鯨白齒
若雪山公平公平挂胃於其間篋篋所悲竟不還

蜀道難

噫吁噫一作噫危乎高哉蜀道之難難於上青天蠶叢
及魚鳧開國何茫然爾來四萬八千歲一作不與秦
塞通人煙西當太白有鳥道可以橫絕峨眉巔地崩
山摧壯士死然後天梯石棧相鈎連上有六龍迴日
之高標下有衝波逆折之迴川黃鶴之飛尚不得過

一本無過字

猿猱欲度愁攀緣青泥何盤盤百步九折縈

巖巒捫參歷井仰脅息以手撫膺坐長歎問君一作人

西遊何當時一作時還畏途巉巖不可攀但見悲鳥號古

一作枯木雄飛雌從遶林間又聞子規啼夜月愁空山

蜀道之難難於上青天使人聽此凋朱顏連峯去天

不盈尺枯松倒挂倚絕壁飛湍瀑流爭喧豨砢崖轉

石萬壑雷其險也如此嗟爾遠道之人胡為乎來哉

劍閣崢嶸而崔嵬一夫當關萬夫莫開所守或匪親

化為狼與豺朝避猛虎夕避長蛇磨牙吮血殺人如

麻錦城雖云樂不如早還家蜀道之難難於上青天

側身西望長咨嗟雌從一
作呼雌

梁甫吟

長嘯梁甫吟何時見陽春君不見朝歌屠叟辭棘津
八十西來釣渭濱寧羞白髮照清一作水逢時吐氣
思經綸廣張三千六百釣風雅暗與文王親大賢虎
變愚不測當年頗似尋常人君不見高陽酒徒起草
中長揖山東隆準公入門不拜騁雄辯兩女輟洗來
趨風東下齊城七十二指麾楚漢如旋蓬狂客落魄
尚如此何況壯士當群雄我欲攀龍見明主雷公砰
訇震天鼓帝旁投壺多玉女三時大笑開電光倏爍

晦冥起風雨閭闔九門不可通以額叩關閭者怒白
日不照吾精誠祀國無事憂天傾楔偷磨牙競人肉
騶虞不折生草莖手接飛猱搏彫虎側足焦原未言
苦智者可卷愚者豪世人見我輕鴻毛力排南山三
壯士齊相殺之費二桃吳楚弄兵一本無此二字無劇孟亞
夫哈爾為徒勞梁甫吟聲正悲張公兩龍劍
神物合有時風雲感會起屠釣大人峴岬當安之一作期

烏夜啼

黃雲城邊烏欲棲歸飛啞啞枝上啼機中織錦秦川
女碧紗如煙隔窻語停梭悵然憶遠人獨宿孤房淚

如雨

烏棲曲

姑蘇臺上烏棲時吳王宮裏醉西施吳歌楚舞歡未
畢青山猶銜半邊日銀箭金壺漏水多趨一作看秋
月墜江波東方漸高奈樂何

戰城南

去年戰桑乾源今年戰葱河道洗兵條支海上波放
馬天山雪中草萬里長征戰三軍盡衰老匈奴以殺
戮為耕作古來唯見白骨黃沙田秦家築城備胡虜
漢家還有烽火燃烽火燃不息征戰無已時野戰格

鬪死敗一作馬號鳴向天悲烏鳶啄人腸銜飛上挂
枯樹枝士卒塗草莽將軍空爾為乃知兵者是凶器
聖人不得已而用之

將進酒

君不見黃河之水天上來奔流到海不復迴君不見
高堂明鏡悲白髮朝如青絲暮成雪人生得意須盡
歡莫使金樽空對月天生我材必有用千金散盡還
復來烹羊宰牛且為樂會須一飲三百盃岑夫子丹
丘生進酒君莫停一本無此五字與君歌一曲請君為我傾
耳聽一本無此二字鐘鼓饌玉不足貴但願長醉不願醒古

來聖賢皆寂寞唯有飲者留其名陳王昔時宴平樂
斗酒十千恣歡譎主人何為言少錢徑須沽取對君
酌五花馬千金裘呼兒將出換美酒與爾同銷萬古
愁

行行且遊獵篇

邊城兒生年不讀字書但將遊獵誇輕趫胡馬秋肥宜
白草騎來躡影何矜驕金鞭拂雪揮鳴鞘半酣呼鷹
出遠郊弓彎滿月不虛發雙鶴迸落連飛鶻海邊觀
者皆辟易猛氣英風振沙磧儒生不及遊俠人白首
下一作惟復何益遊獵誇輕趫知

飛龍引二首

黃帝鑄鼎於荆山鍊丹砂丹砂成黃金騎龍飛上太
清家雲愁海思令人嗟宮中綵女顏如花飄然揮手
凌紫霞從風縱體登鑾車登鑾車侍軒轅遨遊青天
中其樂不可言

鼎湖流水清且閑一本此句是前篇末句軒轅去時有弓劍古

人傳道留其間後宮嬋娟多花顏乘鸞飛煙亦不還

騎龍攀天造天關造天關聞天語長一作屯雲河車載

玉女載玉女過紫皇紫皇乃賜白兔所擣之藥方一本

無方後天而老凋三光下視瑤池見王母蛾眉蕭颯

如秋霜

天馬歌

天馬來出月氏窟背為虎文龍翼骨嘶青雲振綠髮
 蘭筋權竒走滅沒騰崑崙歷西極四足無一蹶雞鳴
 刷燕哺秣越神行電邁躡恍惚天馬呼飛龍趨目明
 長庚臆雙鳧尾如流星首渴烏口噴紅光汗溝朱一作
 珠曾陪時龍躡天衢羈金絡月照皇都逸氣秋秋一作
 稜凌九區白壁如山誰敢沾回頭笑紫鸞但覺爾輩
 愚天馬奔戀君軒駭躍驚矯浮雲翻萬里足一作躑
 躅遙瞻閭闔門不逢寒風子誰採逸景孫白雲在青

天丘陵遠崔嵬鹽車上峻坂倒行逆施畏日晚伯樂
 翦拂中道遺少盡其力老棄之願逢田子方惻然為
 我思一作悲雖有玉山不能療苦飢嚴霜五月凋桂
 枝伏櫪銜冤摧兩眉請君贖獻穆天子猶堪弄影舞
 瑤池

行路難三首

金樽清酒斗十千玉盤珍羞直萬錢停杯投筋不能
 食拔劍四顧心茫然欲渡黃河冰塞川將登太行雪
 暗天閑居一作來垂釣坐溪上忽然復一作乘舟夢日邊
 行路難行路難多岐路今一本無安在長風破浪一作

波會有時直挂雲帆濟滄海

大道如青天我獨不得出羞逐長安社一作吐中兒赤

雞白狗賭梨栗彈劔作歌奏苦聲曳裾王門不稱情

淮陰市井笑韓信漢朝公卿忌賈生君不見昔時燕

家重郭隗擁篲折節一作腰無嫌猜劇辛樂毅感恩分

輸肝剖膽効英才昭王白骨縈蔓草誰人更掃黃金

臺行路難歸去來

有耳莫洗潁川水有口莫食首陽蕨含光混世貴無

名何用孤高比雲月吾觀自古賢達人功成不退皆

殞身子胥既棄吳江上屈原終投湘水濱陸機雄才

豈自保李斯稅駕苦不早華亭鶴唳詎一作誰可聞上

蔡蒼鷹何足道君不見吳中張翰稱達生秋風忽憶

江東行且樂生前一杯酒何須身後千載名

長相思

長相思在長安絡緯秋啼金井欄微霜淒淒簞色寒

孤燈不明思欲絕卷帷望月空長歎美人如花隔雲

端上有青冥之長一作高天下有淶水之波瀾天長路

遠魂飛苦夢魂不到關山難長相思摧心肝

上留田
行至上留田孤墳何崢嶸積此萬古恨春草不復生

悲風四邊來腸斷白楊聲借問誰家地理沒蒿里塋
古老向余言言是上留田蓬科馬鬣今已平昔之弟死
兄不葬他人於此舉銘旌一鳥死百鳥鳴一獸走百
獸驚桓山之禽別離苦欲去迴翔不能征田氏倉卒
骨肉分青天白日摧紫荆交柯一作之木本同形東
枝顛鷓西枝榮無心之物尚如此參商胡乃尋天兵
孤竹延陵讓國揚名高風緬邈頽波激清尺布之謠
塞耳不能聽

春日行

深宮高樓入紫清金作蛟龍盤繡楹佳人當窻弄白

日絃將手語彈鳴箏春風吹落君王耳此曲乃是昇
天行因出天池沆蓬瀛樓臺處沓波浪驚三千雙蛾
獻歌笑搗鐘考鼓宮殿傾萬姓聚舞歌太平我無為
人自寧三十六帝欲相迎一作三十六玉帝相迎仙人飄翻下
雲輦帝不去留鎬京安能為軒轅獨往入宵冥小臣
拜獻南山壽陛下萬古垂鴻名樓臺一作樓船

前有樽酒行二首

春風東來忽相過金樽渌酒生微波落花紛紛稍覺
多美人欲醉朱顏酡此一本無青軒桃李能幾何流光
欺人忽蹉跎君起舞日西夕當年意氣不肯傾白髮

如絲歎何益

琴奏龍門之綠桐
玉壺美酒清若空
催絃拂柱與君
飲看朱成碧
顏始紅
胡姬兒如花
當壚笑春風
笑春風
風舞羅衣君
今不醉欲安歸

夜坐吟

冬夜夜寒覺夜長
沉吟久坐坐北堂
冰合井泉月入
閨青釭凝明
釭一作金照悲啼青
一作金釭滅啼轉多掩
妾淚聽君歌
歌有聲妾有情
情聲合兩無違
一語不入意
從君萬曲梁塵飛
冰合井泉一本無泉字

野田黃雀行

遊莫逐炎洲翠
棲莫近吳宮鶯
吳宮火起焚巢
一作雨
窠炎洲逐翠
遭網羅
蕭條兩翅蓬蒿下
縱有鷹鷂奈
若何

筵篔簹

攀天莫登龍
走山莫騎虎
貴賤結交心
不移唯有嚴
陵及光武
周公稱大聖
管蔡寧相容
漢謠一斗粟
不與淮南春
兄弟尚路人
吾心安所從
他人方寸間
山海幾千重
輕言託朋友
對面九疑峯
多花必早落
桃李不如松
管鮑久已死
何人繼其蹤

雉朝飛

麥隴青青三月時白雉朝飛挾兩雌錦衣綺翼何離
襪犢牧採薪感之悲春天和白日暖啄食飲泉勇氣
滿爭雄鬪死繡頸斷雉子班奏急管絃心傾酒美盡
玉椀枯楊枯楊爾生美我獨七十而孤棲彈絃寫恨
意不盡瞑目一本無歸黃泥

此二字上雲樂老胡文康詞或云湯雲及周捨作今擬之

金天之西白日所沒康老胡鷓生彼月窟巉巖容儀
戍削風骨碧玉炁炁雙目瞳黃金拳拳兩鬢紅華蓋
垂下睫嵩岳臨上一作脣不觀譎詭兒豈知造化神
大道是文康之嚴父元氣乃文康之老親撫頂弄盤

古推車轉天輪云見日月初生時鑄一作冶治一作火

精與水一作金銀陽烏未出谷顧兔半歲身女媧戲黃

土團作愚下人散在六合間濛濛若沙塵生死了不
盡誰明此胡是仙真西海栽若木東溟植扶桑別來
幾多時枝葉萬里長中國有七聖半路頽鴻荒陛下
應運起龍飛入咸陽赤眉立盆子白水興漢光叱咤
四海動洪濤為簸揚舉足蹋紫微天關自開張老胡
感至德東來進仙侶五色師子九苞鳳凰是老胡雞
犬鳴舞飛帝鄉淋灑颯沓進退成行能胡歌獻漢酒
跪雙膝並兩肘散花指天舉素手拜龍顏獻聖壽北

斗戾南山摧天子九九八十一萬歲長傾萬歲杯

夷則格上白鳩拂舞辭

鏗鳴鐘考朗鼓歌白鳩引拂舞白鳩之白誰與鄰霜
衣雪襟誠可珍含哺七子能平均食不咽性安馴首
一作農政鳴陽春天子刻玉杖鏤形賜耆人白鷺亦
白非純真外潔其色心匪仁闕五德無司晨胡為啄
我葭下之紫鱗鷹鷂鷓貪而好殺鳳凰雖大聖不
願以為臣

日出入行

日出東方隈似從地底來歷天又入海一作海又復六

龍所舍一作捨安在哉其始與終古不息人非元氣安

得與之夕徘徊草不謝榮於春風木不怨落於秋天

誰揮鞭策驅四運萬物興歇皆自然義和義和汝奚

一作汨沒於荒淫之波魯陽何德駐景揮戈逆道違

天矯誣實多吾將囊括大塊浩然與溟滓同科一本無

胡無人

嚴風吹霜海草凋筋箠精堅胡馬驕漢家戰士三十

萬將軍兼領霍嫖姚流星白羽腰間插劍花秋蓮光

出匣天兵照雪下玉關虜箭如沙射金甲雲龍風虎

盡交回太白入月敵可摧敵可摧旄頭滅履胡之腸

涉胡血懸胡青天上埋胡紫塞旁胡無人漢道昌陞
下之壽三千霜但歌大風雲飛揚安用猛士兮守四

方一本無
此三句

猛虎行

朝作猛虎行暮作猛虎吟腸斷非關隴頭水淚下不
為雍門琴旗旌繽紛兩河道戰鼓驚山欲傾倒秦人
半作燕地囚胡馬翻銜洛陽草一輪一夫關下兵朝
降夕叛幽薊城巨鼉未斬海水動魚龍奔走安得寧
頗似楚漢時翻覆無定止朝過博浪沙暮入淮陰市
張良未遇韓信貧劉項存亡在兩臣楚到下邳受兵

略來投漂母作主人賢哲恹恹古如此今時亦棄青
雲士有策不敢犯龍鱗竄身南國避胡塵寶書長劔
挂高閣金鞍駿馬散故人昨日方為宣城客掣鈴交
通二千石有時六博快壯心逸牀三匝呼一擲楚人
每道張旭竒心藏風雲世莫知三吳邦伯皆顧眄四
海雄俠兩追隨蕭曹曾作沛中吏攀龍附鳳當有時
溧陽酒樓三月春楊花茫茫愁殺人胡人綠眼吹玉
笛吳歌白紵飛梁塵丈夫相見且為樂搥牛搥鼓會
衆賓我從此去釣東海得魚笑寄情相親胡人一
作胡鷗

北風行

燭龍棲寒門光曜猶旦開日月照之何不及此唯有
北風號怒天上來燕山雪花大如席片片吹落軒轅
臺幽州思婦十二月停歌罷笑雙蛾摧倚門望行人
念君長城苦寒良可哀別時提劍救邊去遺此虎文
金解韉中有一雙白羽箭蜘蛛結網生塵埃箭空在
人今戰死不復迴不忍見此物焚之已成灰黃河捧
土尚可塞北風雨雪一本無此四字恨難裁

俠客行

趙客一作家縵胡纓吳鉤霜雪明銀鞍照白馬颯沓如
流星十步殺一人千里不留行事了拂衣去深藏身

與名聞過信陵飲脫劍膝前橫將炙啖朱亥持觴勸
侯嬴三杯吐然諾五嶽倒為輕眼花耳熱後意氣素
霓生救趙揮金槌邯鄲先震驚千秋二壯士烜赫大
梁城縱死俠骨香不慙世上英誰能書閣下白首太
玄經

關山月

明月出天山蒼茫雲海間一云蒼蒼長風幾萬里吹
度玉門關漢下白登道胡窺青海灣由來征戰地不
見有人還戍客望邊色思歸多苦顏高樓當此夜歎
息未應閑

李翰林集卷第三

